

partibus aequabat iustis aut sorte trahebat:
 cum subito Aeneas concursu accedere magno
 Anthea Sergestumque uidet fortemque Cloanthum 510
 Teucrorumque alios, ater quos aequore turbo
 dispulerat penitusque alias auexerat oras.
 obstipuit simul ipse, simul percussus Achates
 laetitiaque metuque; auidi coniungere dextras
 ardebant, sed res animos incognita turbat. 515
 dissimulant et nube caua speculantur amicti
 quae fortuna uiris, classem quo litore linquant,
 quid ueniant; cunctis nam lecti nauibus ibant
 orantes ueniam et templum clamore petebant.
 Postquam introgressi et coram data copia fandi, 520
 maximus Ilioneus placido sic pectore coepit:
 'o regina, nouam cui condere Iuppiter urbem
 iustitiaque dedit gentis frenare superbas,
 Troes te miseri, uentis maria omnia uecti,
 oramus: prohibe infandos a nauibus ignis, 525
 parce pio generi et propius res aspice nostras.
 non nos aut ferro Libycos populare penatis
 uenimus, aut raptas ad litora uertere praedas;
 non ea uis animo nec tanta superbia uictis.
 est locus, Hesperiam Grai cognomine dicunt, 530
 terra antiqua, potens armis atque ubere glaebae;
 Oenotri coluere uiri; nunc fama minores
 Italiam dixisse ducis de nomine gentem.
 hic cursus fuit,
 cum subito adsurgens fluctu nimbosus Orion 535
 in uada caeca tulit penitusque procacibus Austris
 perque undas superante salo perque inuia saxa
 dispulit; huc pauci uestris ad nauimus oris.